

MÍOCÁ

Teideal

1 Briathar an Tiarna a labhraíodh le Míocá, an Móraisteach, in aimsir Iótám agus Áchaz agus Hiziciá, ríthe Iúdá, agus na físeanna a chonaic sé faoin tSamáir agus faoi Iarúsailéim.

Breith an Tiarna ar a Phobal

Daorbhreith ar an tSamáir

2 Éistigí, a phobala uile;

cloisigí, a dhomhain agus a bhfuil ann.

Tá an Tiarna Dia le fianaise a thabhairt in bhur n-aghaidh nuair a bhuaifidh sé amach óna phálas naofa.

3 Óir, féach, tá an Tiarna ag teacht amach as a áit chónaithe agus anuas agus ag céimniú ar arda na cruinne.

4 Tá na sléibhte á leá agus na gleannta á reabadh faoina chosa mar chéir os comhair na tine nó mar uisce a dhoirtear le fána ghéar.



⁵ De dheasca choir Iacóib is ea a tharlaíonn sé seo go léir de dheasca pheaca theaghlach Iosrael.

Agus céard é coir Iacóib?

Nach í an tSamáir í?

Agus céard é peaca theaghlach Iúdá?

Nach í Iarúsailéim í?

⁶ Fothrach i lár páirce is ea a dhéanfaidh mé den tSamáir, áit a chuirfear faoi fhíniúna.

Caithfidh mé clocha a foirgneamh síos sa ghleann nó go nochtfar an bhunsraith.

⁷ Brisfear a dealbha uile;

dófar a cuid ofrálacha go léir sa tine;

déanfaidh mé smidiríní dá híola uile.

Óir is le tuarastal striapachais a cruinníodh iad agus déanfar tuarastal striapachais díobh arís.

Caoineadh

⁸ Seo an fáth a ndéanfaidh mé ochlán agus olagón agus a rachaidh mé cosnocha lom agus a mbéicfidh mé ar nós na seacál agus a gcaoinfidh mé mar na hostraisí.



- ⁹ Níl luibh ná leigheas in aghaidh [buille an Tiarna],
óir d'aimsigh sé Iúdá
agus bhain sé amach geata mo phobail
agus tháinig sé fad le Iarúsailéim féin.
- ¹⁰ Ná fógraígí é seo i nGat;
ná siligí deora [i mBáca];
déanaigí sibh féin a iomlasc sa deannach i mBéit Afrá!
- ¹¹ Séidigí an stoc,
a áitritheoirí Shaifír!
Ní bhogann áitritheoirí Zánán
amach as a mbaile.
Tá Béit Eizéil faoi bhrón;
tógfar uait gach taca.
- ¹² Conas is féidir le háitritheoirí Mhárót
bheith ag súil lena slánú;
mar tá an mí-ádh tar éis teacht anuas ón Tiarna
fad le geataí Iarúsailéim féin.
- ¹³ Cuirigí na capaill mheara faoi na carbaid,
a áitritheoirí Láicís!
(Is é seo an chéad pheaca a rinne iníon Shíón;
óir bhí cionta Iosrael le fáil ionatsa.)



- ¹⁴ Tá do dhiúltú tugtha duitse, a Mhóraisit Gat.
Tá tithe Aiczíb tar éis iompú amach
ina n-ábhar meallta do ríthe Iosrael.
- ¹⁵ Uair amháin eile tiocfaidh an gabhálaí chugaibh,
a áitritheoirí Mháraeiseá.
Scríosfar Adulám go deo
ar nós ghlóir Iosrael.
- ¹⁶ Bearr thú féin agus lom do chuid gruaige
mar gheall ar do chlann mhac ionúin.
Déanaigí sibh féin chomh maol le badhbh;
óir imeoidh siad uait ar deoraíocht.

Daor tar Lucht an tSaibhris

- 2** Mairg don mhuintir a bhíonn ag meabhrú urchóide
agus ag beartú oilc ar a leaba.
Le céadsolas na maidine siúd chun gníomhartha iad
mar is acmhainn dóibh é.
- ² Santaíonn siad goirt agus gabhann siad iad;
cuireann siad a ndúil i dtithe agus glacann siad seilbh orthu;
déanann siad éagóir ar dhuine agus coigistíonn siad a theach;
creachann siad duine eile agus baineann siad de a oidhreacht.



- ³ Dá dheasca sin labhraíonn an Tiarna leo mar seo:
 Féach! In aghaidh na muintire seo táim ag meabhrú oilc
 nach dtarraingeoidh sibh bhur muineál saor uaidh;
 ní shiúlfaidh sibh ceann in airde feasta
 a dhonacht is a bheidh an uain.
- ⁴ An lá sin cumfar aoir agus canfar caoineadh fúibh mar seo:
 “Táimid scriosta go hiomlán;
 tá fearann mo phobail á thomhas le dorú
 agus ní thabharfar ar ais dóibh é go deo;
 tá ár gcuid talún á roinnt amach.”
- ⁵ Sin é an fáth nach mbeidh aon duine agaibh
 chun dorú a leagan daoibh
 ar ghabháltas ar bith i gcomhthionól an Tiarna.

Aighneas idir an Fáidh agus na Peacaigh

- ⁶ “Ná déanaigíse praeitseáil” – sin é a bpraeitseáil siúd –
 “Ní ceart daoibh bheith ag rámhailíocht mar seo;
 ní thóghfar an náire chun siúil go deo.”
- ⁷ An amhlaidh atá alltacht ar theaghlach Iacóib?
 An bhfuil briste ar an bhfoighne ag an Tiarna?
 An é sin an rud is nós leis a dhéanamh?



Nach dea-chroíoch iad na briathra a labhraíonn sé
lena phobal féin Iosrael?

⁸ Mar sin féin, ní sibhse mo phobal;
éiríonn sibh suas ina choinne mar naimhde;
baineann sibh a fhallaing den duine síochánta
agus déanann sibh cime cogaidh den taistealaí neamhamhrasach.

⁹ Díbríonn sibh bantracht mo phobail
amach as a dtithe breátha
agus baineann sibh dá leanaí
an gradam a bhronn mise orthu.

¹⁰ “Éirígí! Amach libh! [a deir sibh leo].
Ní ionad sosa daoibhse é seo!”
Agus éilíonn sibh bannaí míchuíosacha orthu
ar rudaí suaracha.

¹¹ Fear a bheadh ag tóraíocht baoise agus bréag
agus á rá go cealgach: “Geallaimse daoibh fíon agus flúirse dí”
– sin é an sort duine a bheadh ina fháidh
ag na daoine seo.

Athchruinniú Iosrael

¹² Go cinnte dearfa cruinneoidh mé Iacób go léir;
baileoidh mé fuílleach Iosrael le chéile;



déanfaidh mé aon bhuíon amháin díobh
 mar chaoirigh i loc
 nó mar thréad ar féarach
 sa chaoi go mbeidh na sluaite ann ag déanamh gleo.

¹³ Ag gluaiseacht rompu amach
 beidh an té a dhéanfaidh bearna dóibh.
 Brisfidh siad an geata agus imeoidh siad amach tríd.
 Gabhfaidh an rí rompu;
 is é an Tiarna féin a bheidh mar cheannaire orthu.

Daor tar Urchóid na dTiarnaí

3 Agus dúirt mé: Éistigí, a cheanna urra Iacóib,
 a thaoiseacha theaghlach Iosrael!

Nach é bhur ndualgas é
 eolas a bheith agaibh ar céard is ceart?

² Sibhse, a bhfuil fuath agaibh don mhaith agus grá agaibh don olc,
 a stróiceann an craiceann de dhaoine
 agus a bhaineann an fheoil dá gcnámha,

³ a alpann feoil mo phobail;
 is a bhaineann a gcraiceann díobh;
 a bhriseann a gcnámha



agus a ghearrann ina bpíosáí iad mar fheoil i gcorcán
nó mar chonablach i gcoire.

⁴Éifidh siad ar an Tiarna an uair sin
ach ní thabharfaidh sé freagra orthu;
folóidh sé a aghaidh orthu
de bhrí go ndearna siad drochghníomhartha.

Daortar Saint na bhFáithe Mealltacha

⁵Is mar seo a labhraíonn an Tiarna i dtaobh na bhfáithe
a chuireann mo phobal ar seachrán;
fad a bhíonn rud éigin le cogaint
acu fógraíonn siad síocháin
ach fearann siad cogadh naofa ar an té
nach gcuireann dada ina mbéal.

⁶Dá dheasca sin titfidh an oíche oraibh;
ní bheidh a thuilleadh físeanna agaibh;
clúdóidh an dorchadas sibh
agus ní dhéanfaidh sibh fáistine feasta.
Is ea, rachaidh an ghrian faoi ar na fáithe
agus dorchóidh an lá orthu.



- ⁷ Ansin beidh náire ar na físithe
agus ceann faoi ar an lucht fáistine.
Clúdóidh siad a mbéal
mar ní thabharfaidh Dia freagra orthu níos mó.
- ⁸ Ach i dtaca liomsa de táimse lán de chumhacht
(agus de spiorad an Tiarna)
agus de cheart agus de mhisneach
chun a choir a thaispeáint do Iacób
agus a pheaca a léiriú do Iosrael.

Léirscríosfar Síón de bharr na hUasaicme

- ⁹ Éistigí leis seo, a cheanna urra Iacóib,
a thaoiseacha theaghlach Iosrael,
a bhfuil dearg-ghráin agaibh ar an gceart,
a chuireann gach ní dá bhfuil cóir as a riocht,
- ¹⁰ a thógann Síón le fuil
agus Iarúsailéim le héigeart.
- ¹¹ De thoradh breabanna tugann a cinn urra breithiúnas;
múineann a sagairt ar thuarastal
agus déanann a fáithe fáistine ar airgead geal.
Ach mar sin féin cuireann siad a muinín as an Tiarna



agus deir siad: “Nach bhfuil an Tiarna inár measc?
Ní thiochfaidh aon mhí-ádh orainn.”

¹² Dá dheasca sin déanfar gort treafa de Shíón
agus fothrach de Iarúsailéim
agus ardán crannach de Shliabh an Teampaill
mar gheall oraibhse.

Glóir Iosrael Nua

Síón, Lár na Ríochta Nua

4 Titfidh sé amach san am atá le teacht
go mbeidh an sliabh a bhfuil teach an Tiarna air
os cionn na sléibhte
agus go dtógfar níos airde ná na cnoic é.
Tiochfaidh na ciníocha ina sruth go dtí é.

² Is iomaí pobal a rachaidh ann agus a déarfaidh:
“Seo linn, téimis suas go sliabh an Tiarna,
go teach Dhia Iacóib,
chun go múine sé dúinn a shlite
agus go siúlaimis a bhealaí.



Óir ó Shíón rachaidh an dlí amach,
agus ó Iarúsailéim briathar an Tiarna.”

³ Beidh smacht aige ar na ciníocha
agus déanfaidh sé réiteach idir an iomad pobal atá i bhfad i gcéin,
agus buailfidh siad a gclaimhte amach ina socanna céachta
agus a sleánna ina gcorráin.

Ní thógfaidh na ciníocha an claíomh in aghaidh a chéile a thuilleadh,
ná ní chleachtfaidh siad cogadh níos mó.

⁴ Beidh an uile dhuine ina shuí faoina fhíniúin
agus faoina chrann fíigí agus ní chuirfidh aon fhear eagla orthu.
Is é béal Tiarna na Slua a dúirt é.

⁵ Óir gluaiseann gach uile cheann de na ciníocha ar aghaidh
in ainm a dhé féin
ach siúlfaimidne in ainm an Tiarna, ár nDia, go brách is choíche.

Athchruinniú an Tréada Scaipthe

⁶ An lá sin – a deir an Tiarna,
cruinneoidh mé na caoirigh bhacacha;
baileoidh mé na cinn a ruaigeadh chun fáin
agus na cinn ar thug mé drochíde dóibh.



- ⁷ Beidh na bcaigh sin ina bhfuilleach agam
 agus déanfaidh mé náisiún láidir
 den mhuintir atá tuirseach traochta.
 Beidh an Tiarna féin ina rí orthu ar Shliabh Shíón
 as seo amach agus go deo.
- ⁸ Agus tusa, a thúir an tréada,
 a chnocáin iníon Shíón,
 tiocfaidh chugat ar ais
 an tiarnas a bhí agat tráth
 agus ríúlacht iníon Iarúsailéim.

An Deoraíocht Shlánaitheach

- ⁹ Cén fáth a nglaoonn tú amach chomh hard sin anois?
 Nach bhfuil aon rí agat?
 An amhlaidh a cailleadh do chomhairleoir
 sa chaoi gur ghabh arraingeacha thú
 mar bhean ina leaba luí seoil?
- ¹⁰ Bí ag lúbarnaíl agus ag cneadach, a iníon Shíón,
 mar bhean ina leaba luí seoil.
 Óir beidh ort imeacht as an gcathair anois
 agus cur fút faoin tuath.



Rachaidh tú go dtí an Bhablóin
 ach slánófar ann thú.
 Mar is ann a fhuasclóidh an Tiarna thú
 ó lámha do naimhde.

Sat Ióidh Síón ar a Naimhde

- ¹¹ Tá a lán náisiún
 ag cruinniú le chéile i d'aghaidh anois.
 Deir siad: “Go dtruailítear í
 ionas go bhfeicfidh ár súile féin bascadh Shíón.
- ¹² Ach ní eol dóibh smaointe an Tiarna
 agus ní mó ná sin a thuigeann siad a rún;
 mar tá sé tar éis iad a bhailiú le chéile
 mar phunanna ar urlár buailte.
- ¹³ Éirigh, a iníon Shíón,
 agus déan an bualadh.
 Tabharfaidh mé adharca iarainn
 agus crúba cré-umha duit
 chun go mbascaidh tú mórán ciníocha
 agus go gcoisricfidh tú a gcreach don Tiarna
 agus a saibhreas do Thiarna an domhain go léir.



Gradam an Rí a Éireoidh as Beithil

¹⁴ [Gearr thú féin anois, a iníon chogúil]
 táthar tar éis léigear a chur orainn
 agus breitheamh Iosrael
 a bhualadh sa leiceann le slat.

5 Ach tusa, a Bheithil Eafráta
 bíodh gur beag thú i measc chlanna Iúdá
 is asatsa a thiocfaidh chugam
 an té a bheidh ina cheann urra ar Iosrael,
 an té a dtéann a shinsearachta na cianta siar
 go dtí an t-am fadó.

² Sin é an fáth a dtréigfidh Dia iad
 go dtí go mbéarfai mac di siúd,
 a bhfuil tinneas clainne uirthi,
 ansin fillfidh iarmhar a bhráithre ar chlann Iosrael.

³ Seasfaidh sé go daingean agus beathóidh sé a thréad
 trí chumhacht an Tiarna
 agus le mórgacht ainm an Tiarna, a Dhia.
 Mairfidh siad go slán sábháilte
 mar leathnóidh a chumhacht amach ansin go críocha na cruinne.



- ⁴ Beidh sé féin ina údar síochána;
nuair a thiocfaidh an Asaír isteach inár dtír,
nuair a chuirfidh siad cos laistigh dár gcríocha,
múscloimid seachtar aoire agus ochtar taoiseach ina gcoinne.
- ⁵ Smachtóidh siad tír na hAsaíre le claíomh
agus dúiche Niomrod le treise lainne.
Fuasclóidh sé sinn ón Asaír
má thagann siad isteach inár dtír,
fiú má chuireann siad cos laistigh dár gcríocha.

Cinniúint Fhuíl Ieach Iacóib

- ⁶ Agus beidh fúilleach Iacóib
i measc a lán náisiún
mar a bheadh an drúcht a thagann ón Tiarna
nó mar bhraonta báistí ar an bhféar glas.
Ní chuirfidh siad a muinín as aon fhear;
ní bheidh siad ag tnúth le cabhair ó mhuintir an tsaoil seo.
- ⁷ Beidh fúilleach Iacóib i measc a lán náisiún
(i measc a lán pobal),
mar leon i measc ainmhithe na foraoise
nó mar liopard i measc tréada caorach.



Nuair a théann sé thart gabhann sé de chosa ina chreach
 agus stróiceann sé as a chéile í
 agus ní sciobfar uaidh í go deo.

⁸ Ardóidh tú do lámha ín aghaidh d'eascairde
 agus díothófar do naimhde go léir.

Díoltas an Tiarna

⁹ An lá sin – a deir an Tiarna – díisceoidh mé na capaill atá agat
 agus scriosfaidh mé do chuid carbad.

¹⁰ Scartálfaidh mé bailte do thíre
 agus leagfaidh mé do dhúnta uile.

¹¹ Bainfidh mé do chuid orthanna as do láimh
 agus ní bheidh aon draoi agat feasta.

¹² Millfidh mé na híola agus na liagáin atá agat
 agus ní dhéanfaidh tú sléachtadh níos mó
 do dhéantús do lámh féin.

¹³ Stoithfidh mé do chuailí naofa
 aníos as an talamh
 agus treascróidh mé do chuid íomhána cloch.

¹⁴ Le confadh feirge imreoidh mé díoltas
 ar na ciníocha nach ngéilleann dom.



An Chúis in Aghaidh Iosrael

Aighneas idir an Tiarna agus Iosrael

- 6** Éistigí anois lena bhfuil le rá ag an Tiarna:
Éirigh agus agair do chúis i bhfianaise na sléibhte;
cloiseadh na cnoic do ghuth.
- ² Éistigí, a shléibhte,
leis an gcúiseamh a dhéanann an Tiarna;
tugaigí cluas, a bhunsraitheanna an domhain.
Óir tá cúis dlí ar bun ag an Tiarna in aghaidh a phobail
agus tá sé ag aighneas le hIosrael.
- ³ “A phobal liom, céard a rinne mé ort?
Cén chaoi ar chuir mé tuirse ort?
Tabhair freagra orm.
- ⁴ Óir is mise a thug suas as críocha na hÉigipte thú;
mise a d’fhuascail thú as teach na daoirse.
Chuir mé Maois os do chionn
agus Árón agus Miriám in éineacht leis.
- ⁵ Cuimhnigh ansin ar a raibh beartaithe ag Bálác, rí Mhóáb,
agus ar an bhfreagra a thug Balám mac Bheór air



agus tú ag gluaiseacht ó Shitím go Gilgeál
chun go dtuigfidh tú na gníomhartha slánaitheacha a rinne mé.”

⁶ “Créad leis a dtiocfaidh mé os comhair an Tiarna
nó a sléachtfaidh mé do Dhia neimhe?

An dtiocfaidh mé os a chomhair le híobartaigh lándóite
nó le laonna aon bhliana?

⁷ Ar mhaith leis na mílte reithe

nó deich míle de shruthanna ola?

An ofrálfaidh mé dó an mac is sine liom mar chúiteamh i mo chionta,
toradh mo choirp in éiric peacaí m’anama?”

⁸ Míníodh duit, a dhuine, céard is maith
agus céard a iarrann an Tiarna ort.

Níl uaidh ach seo: an ceart a dhéanamh,
buanghrá a chothú

agus siúl go humhal i bhfochair do Dhé.

Daortar Éigear t agus Caimiléireacht

⁹ Éist! Tá an Tiarna ag glaoch ar an gcathair
(is den chríonnacht d’ainm a eaglú).

Éistigí, a threibh agus a chomhairle na cathrach sin,



- ¹² a bhfuil a lucht saibhris lán den fhoréigean agus a mbíonn a háitritheoirí ag insint bréag (is mealltach í an teanga atá ina mbéal acu).
- ¹⁰ An amhlaidh a chaithfidh mé an taisceadh éagórach agus an buiséal gann mallaithe a cheadú freisin?
- ¹¹ An amhlaidh a chaithfidh mé saorbhreith a thabhairt ar lucht na scálaí éagothroma agus an mhála de mheáchain mhealltacha?
- ¹³ Ní amhlaidh go deimhin! Ach tosóidh mé ar thú a bhualadh agus ar scaoll a chur ionat de dheasca do pheacaí.
- ¹⁴ Íosfaidh tú ach ní bheidh do dhóthain agat agus beidh sceimhle ocrais i do ghoile. Cuirfidh tú nithe i dtaisce ach ní shábhálfaidh tú dada agus fiú má éiríonn leat rud éigin a shábháil fágfaidh mise ag an gcláiomh é.
- ¹⁵ Cuirfidh tú síol ach ní bhainfidh tú fómhar; satlóidh tú caora olóige ach ní ungfaidh tú thú féin leis an ola choíche; pasálfaidh tú caora fíniúna ach ní ólfaidh tú braon den fhíon.
- ¹⁶ Choimeád tú reachtanna Omraí agus gnásanna uile theaghlach Acháb



agus is í a gcomhairle siúd a lean tú.
 Dá dheasca sin déanfaidh mé fothrach díot
 agus beidh d'áitritheoirí ina gceap magaidh
 agus beidh orthu cur suas le maslaí na náisiún.

Caoineadh an Fháidh

- 7** Mo léan! Táimse mar a bheinn
 dá mbeadh na torthaí bailithe
 agus fómhar na bhfíniúna thart;
 níl caor ar bith le hithe
 agus na fíigí luatha a bhfuil dúil agam iontu
 níl ceann díobh ar fáil níos mó.
- 2** Tá an dea-dhuine imithe ar ceal ón tír;
 níl aon fhear ionraic i measc an phobail;
 bíonn siad go léir in oirchill na fola
 agus téann gach duine díobh ar thóir a bhráthar.
- 3** Tá a lámha oilte ar an olc a dhéanamh;
 bíonn síntiús éigin á lorg ag an ardfheidhmeannach
 agus is féidir an breitheamh a cheannach le breab
 agus labhraíonn an fear tiarnais de réir a mhéine féin.
 Mo chreach! Camann siad an dlí.



- ⁴ Is cosúil le dris fhiáin an chuid is fearr acu;
is cuma nó fál sceach na daoine is ionraice orthu.
Ach tá lá [a] bhfiosraithe ag teacht
agus is ansin is ea a bheidh mearbhall orthu.
- ⁵ Ná cuirigí muinín as bhur gcomharsana;
ná téigí ar iontaoibh bhur gcairde.
Cosain doirse do bhéil ar do bhean chéile.
- ⁶ Óir tugann an mac easonóir dá athair
agus éiríonn an iníon suas in aghaidh a máthar
agus an banchliamhain in aghaidh máthar a céile
agus is lucht a theaghlaigh féin is naimhde do dhuine.
- ⁷ Ach i dtaca liom féin de is ar an Tiarna a bhím ag brath;
cuirim mo dhóchas i nDia mo Shlánaitheoir
agus éistfidh mo Dhia liom.

Dóchas d'Ainneoin Dóláis

- ⁸ Ná bíodh lúcháir ort, a namhaid liom, mar gheall ormsa;
fiú má mhairim sa dorchadas is é an Tiarna féin mo sholas.
- ⁹ Caithfidh mé cur suas le fearg an Tiarna
– mar pheacaigh mé ina choinne –
go dtí go n-agraíonn sé mo chúis



agus go seasann sé ceart dom.

Treoróidh sé mé chun an tsolais

agus feicfidh mé na gníomhartha slánaitheacha a dhéanann sé.

¹⁰ Feicfidh mo namhaid é seo

agus déanfar ceap magaidh den té a dúirt liomsa:

“Cá bhfuil do Dhia?”

Bainfidh mé lán na súl aisti;

gabhfار de chosa inti anois

mar lathach na sráideanna.

Ré Nua Rathúnais

¹¹ Tá an lá a n-atógfar do bhallaí ag teacht;

an lá sin leathnófar do chríocha.

¹² An lá sin tiocfar chugat

ón Asáir go dtí an Éigipt,

ón Tuír go dtí an Abhainn,

ó mhuir go muir agus ó shliabh go sliabh.

¹³ Agus beidh an tír agus a háitritheoirí ina n-ábhar uafáis

de dheasca a ndrochghníomhartha.



Guí an Phobail

- ¹⁴ Seol do phobal chun féaraigh le do bhata,
an tréad atá ina oidhreacht agat,
a lonnaíonn ina aonar sa choill i lár na mbánta.
Cuir ar féarach iad i mBáiseán agus i nGileád
mar a mbídís san am fadó.
- ¹⁵ [Taispeáin dúinn] éachtaí mar a rinne tú agus tú ag imeacht as an Éigipt.
- ¹⁶ Feicfidh na náisiúin iad
agus beidh ceann faoi orthu dá mhéad a gcumhacht.
Cuirfidh siad a lámha lena mbéal
agus beidh bodhaire ina gcluasa.
- ¹⁷ Lífidh siad an deannach ar nós nathracha nimhe,
ar nós péisteanna na talún.
Tiocfaidh siad amach as a ndúnta
agus iad ar aon bharr creatha le heagla romhat, ár dTiarna Dia.
- ¹⁸ Cén Dia atá cosúil leatsa?
Óir tógann tú peacaí chun siúil
agus maitheann tú a gcionta d'fhuílleach d'oidhreachta;
ní buan í do chuid feirge
agus is áil leat an buanghrá.



- ¹⁹ Déanfaidh tú trócaire orainn arís;
gabhfaidh tú de chosa inár bpeacaí
agus caithfidh tú ár gcionta go léir
isteach i nduibheagán na farraige.
- ²⁰ Léirigh do dhílseacht do Iacób
agus do bhuanghrá d'Abrahám
faoi mar a mhionnaigh tú dár sinsir riamh anall.

